


東坡烏臺詩案
龍筋鳳髓判(二)



東坡烏臺詩案

朋九萬撰

東坡烏臺詩案

本館據函海本排
印初編各叢書僅
有此本

東坡烏臺詩案

宋 朋九萬撰

監察御史裏行何大正劄子

御史臺根勘所元豐二年七月四日准中書批送下太子中允權監察御史裏行何大正劄子臣伏見祠部員外郎直史館知湖州蘇軾謝上表其中有言愚不識時難以追陪新進老不生事或能牧養小民愚弄朝廷妄自尊大宣傳中外孰不嘆驚夫小人爲邪治世所不能免大明旁燭則其類自消固未有如軾爲惡不悛怙終自若謗訕譏罵無所不爲道路之人則又以爲一有水旱之災盜賊之變軾必倡言歸咎新法喜動顏色惟恐不甚今更明上章疏肆爲詆誚無所忌憚矣夫出而事主所懷如此世之大惡何以復加昔成王戒康叔以助王宅天命作新民人有小罪非眚乃惟終不可不殺蓋習俱汚陋難以不變不如是不足以作民而新之況今法度未完風俗未一正宜大明誅賞以示天下如軾之惡可以止而勿治乎軾所爲譏諷文字傳於人者甚衆今猶取鑊板而鬻於市者進呈伏望陛下特賜留神取進止元豐二年三月二十七日垂拱殿進呈奉聖旨送中書

監察御史裏行舒亶劄子

太子中允集賢殿校理權監察御史裏行舒亶劄子臣伏見知湖州蘇軾近謝上表有譏切時事之言流俗翕然爭相傳誦忠義之士無不憤惋且陛下自新美法度以來異論之人固不爲少然其大不過文亂

事實造作讖說。以爲搖奪沮壞之計。其次。又不過腹非背毀。行察坐伺。以幸天下之無成功而已。至於包藏禍心。怨望其上。訕謔慢罵。而無復人臣之節者。未有如軾也。蓋陛下發錢以本業貧民。則曰贏得兒童。語音好。一年強半在城中。陛下明法以課試郡吏。則曰讀書萬卷不讀律。致君堯舜知無術。陛下興水利。則曰東海若知明主意。應教斥鹵變桑田。陛下謹鹽禁。則曰豈是聞韶解忘味。邇來三月食無鹽。其他觸物卽事。應口所言。無一不以譏謗爲主。小則鏤板大則刻石。傳播中外。自以爲能。其尤甚者。至遠引襄漢梁竇專朝之士。雜取小說燕蝠爭晨昏之語。旁屬大臣。而緣以指斥乘輿。蓋可謂大不恭矣。然臣切考歷古以來。書傳所載。其間擾攘之世。上之人雖有失德之行。違道之政。而逆節不軌之臣。苟能正其短以動搖人心。亦必回容顧避。自託於忠順之名。而後敢出此。恭惟陛下躬履道德。立政造士。以幸天下。後世可謂堯舜之用心矣。軾在此時。以苟得之虛名。無用之曲學。官爲省郎。職在文館。典領寄任。又皆古所謂二千石。臣獨不知陛下何負於天下。與軾輩。而軾敢爲悖慢。無所畏忌。以至如是。且人道之所自立者。以有義。而無逃於天地之間者。義莫如君臣。軾之所爲。忍出於此。其能知有君臣之義乎。夫爲人臣者。苟能充無義之心。往以爲利。則其惡無所不至矣。然則陛下其能保軾之不爲此乎。昔者治古之隆。責私議之殊。說命之曰。不收之民。狃於茲宄。敗常亂俗。雖細不宥。按軾懷怨天之心。造訕上之語。情理深害。事至暴白。雖萬死不足以謝聖時。豈特在不收不宥而已。伏望陛下體先王之義。用治世之重典。付軾有司。論如大不恭。以戒天下之爲人臣子者。不勝忠憤懇切之至。印行四冊。謹具進呈。取進止。元豐二年七月二日。崇

政殿進呈奉聖旨送中書

國子博士李宜之狀

國子博士李宜之狀。昨任提舉淮東常平。過宿州靈璧鎮。有本鎮居止張碩秀才。稱蘇軾與本家撰靈壁張氏園亭亭記。內有一節。稱古之君子不必仕。不必不仕。必仕則忘其身。必不仕則忘其君。譬之飲食。適於饑飽而已。然士罕能蹈其義。赴其節。處者安於故而難出。出者狃於利而忘返。于是有違親絕俗之議。懷祿苟安之弊。宜之看詳上件文字。義理不順。言不必仕。是教天下之人。必無進之心。以亂取士之法。又軾言。必不仕。則忘其君。是教天下之人。無尊君之義。虧大忠之節。又軾稱。譬之飲食。適於饑飽而已。然士罕能蹈其義。赴其節。宜之詳此。卽知天下之人。仕與不仕。不敢忘其君。而獨軾有不仕。則忘其君之意。是廢爲臣之道。又軾稱。處者安於故而難出。出者狃於利而忘返。於是。有違親絕俗之議。懷祿苟安之弊。顯涉譏諷。乞賜根勘。

御史中丞李定劄子

右諫議大夫權御史中丞李定劄子。臣切見知湖州蘇軾。初無學術。濫得時名。偶中異科。遂叨儒館。及上聖興作。新進仕者。非軾之所合。軾自度終不爲朝廷獎用。銜怨懷怒。恣行醜詆。見於文字。衆所共知。或有燕蝠之譏。或有竇梁之比。其言雖屬所憾。其意不無所寓。訕上罵下。法所不宥。臣切謂。軾有可廢之罪。四臣請陳之。昔者堯不誅四凶。而至舜則流放竄殛之。蓋其惡始見於天下。軾先騰沮毀之論。陛下稍置之。

不問容其改過。軾怙終不悔。其惡已著。此一可廢也。古人教而不從。然後誅之。蓋吾之所以俟之者盡。然後戮辱隨焉。陛下所以俟軾者可謂盡。而傲悖之語日聞中外。此二可廢也。軾所爲文辭雖不中理。亦足以鼓動流俗。所謂言僞而辨。當官侮慢。不循陛下之法。操心頑愎。不服陛下之化。所謂行僞而堅。言僞而辨。行僞而堅。先王之法當誅。此三可廢也。書刑故無小知。而爲與夫不知而爲者異也。軾讀史傳。豈不知事君有禮。訕上有誅。肆其憤心。公爲詆訾。而又應制舉對策。卽已有厭獎更法之意。陛下修明政事。怨不用己。遂一切毀之。以爲非是。此四可廢也。而尙容於職位。傷教亂俗。莫甚於此。臣伏惟陛下動靜語默。惟道之從。興除制作。肇新百度。謂宜可以於變天下。而至今未至純著。殆以軾輩虛名浮論。足以感動衆人。故也。臣叨預執法。職在糾姦。罪有不容。其敢苟止。伏望陛下斷自天衷。特行典憲。非特沮乖慝之氣。抑亦奮忠良之心。好惡旣明。風俗自革。有補於世。豈細也哉。取進止。元豐二年七月二日。崇政殿進呈。奉聖旨。後批四狀并冊子。七月三日進呈。奉聖旨。送御史臺根勘聞奏。

御史臺檢會送到冊子

檢會送到冊子。題名是元豐續添蘇子瞻學士錢塘集全冊。內除目錄更不抄寫外。其三卷並錄付中書門下。奏據審刑院尙書刑部狀。御史臺根勘到祠部員外郎直史館蘇軾。爲作詩賦。并諸般文字。謗訕朝政。及中外臣僚。絳州團練使駙馬都尉王銍。爲留蘇軾譏諷文字。及上書奏事不實。按并劄子二道者。

供狀

祠部員外郎直史館蘇軾年四十四歲本貫眉州眉山縣高祖祐曾祖杲並不仕祖序故任大理評事致仕累贈職方員外郎父洵故任霸州文安縣主簿累贈都官員外郎軾嘉祐二年進士及第初任河南府福昌縣主簿未赴任間應中制科授大理評事鳳翔府簽判覃恩轉大理寺丞磨勘轉殿中丞差判登聞鼓院試館職除直史館丁父憂服闋差判官誥院兼判尚書祠部權開封府推官磨勘轉太常博士通判杭州就差知密州磨勘轉祠部員外郎就差知河中府未到任改差知徐州未滿就移知湖州元豐二年四月二十一日到任歷仕舉主陝西轉運副使陸說舉臺閣清要任使提點兩浙刑獄晁端彥舉外擢任使權兩浙提刑潘良器京東安撫使向京並舉召還侍從權京東路轉運副使王居卿轉運判官李察並舉不次清要任使安撫使陳薦蘇濟舉外陟侍從提舉李清臣舉不次外擢任使提刑孔宗翰奏乞召還禁近軍判章□奏乞召置侍從安撫使葉廉奏乞顯用提舉李孝孫乞召還侍從安撫使賈昌衡奏乞召還近侍軾任鳳翔府簽判日爲中元節假不過知府廳罰銅八斤任杭州通判日不舉駁王文敏盜官錢官員公按罰銅八斤皆公罰別無過紀款招登科後來入館多年未甚進擢兼朝廷用人多是少年所見與軾不同以此撰作詩賦文字譏諷意圖衆人傳看以軾所言爲常軾與張方平王誨李清臣黃庭堅司馬光范鎮孫覺李常曾鞏周邠蘇轍王鞏劉摯陳襄錢藻顏復盛僑王紛錢世宏吳瑄王安上杜子方咸秉道陳珪相識其人等與軾意相同卽是與朝廷新法時事不合及多是朝廷不甚進用之人軾所以將譏諷文字寄與如後

與王詵往來詩賦

一與王詵干涉事。記熙寧二年。軾在京授差遣。王詵作駙馬。後軾去。王詵宅。與王詵寫作詩賦。并蓮花經等。本人累經送酒食茶果等與軾。當年內。王詵又送弓一張。箭十隻。包指十箇。與軾。熙寧八年。成都僧惟簡。託軾在京求師號。軾遂將本家元收畫一軸。送與王詵。稱是川僧畫。覓師號。王詵允許。當年有祕丞柳詢家貧。干軾。軾爲無錢。得犀一株。送與王詵。稱是柳祕丞犀。欲賣三十貫。王詵云。不須得犀。遂送錢三十貫與柳詢。軾於王詵處得師號一道。當年內有相國寺僧思大師。告軾於王詵處。與小師覓紫衣一道。仍將到吳生畫佛入涅槃一軸。董羽水障一。徐熙畫海棠本芍藥梅花雀竹各一軸。趙昌畫折枝花一軸。朱繇武宗元畫鬼神二軸。說與王詵知。後將佛入涅槃及桃花雀竹等與王詵。朱繇武宗元畫鬼神。軾自收留於詵處。換得紫衣二道。與思大師。當年軾將畫三十六軸。各有唐賢題名。託王詵令人裝褙。其物料手工。並是王詵出備。當年軾通判。欲赴任。王詵送到茶藥紙筆墨硯。鯊魚皮紫茸氍毹。藤蓆等。軾留下十一月到任。熙寧五年內。王詵送到官酒十瓶。果子兩筩。與軾。熙寧六年內。遊孤山。詩寄詵。除無譏諷外。有誤隨弓旌落塵土。坐使鞭箠環呻呼。以譏諷朝廷。新法行後。公事鞭箠之多也。又曰。追胥保伍罪及孥。百日愁嘆。一日娛。以譏諷朝廷。鹽法收坐同保妻子。移鄉法太急也。又曰。歲荒無術歸亡逋。鵠則易畫虎難摸。意取馬援言。畫鵠不成。猶類鶩。畫虎不成。反類狗。言歲既饑荒。我欲出奇畫賑濟。又恐朝廷不從。乃以畫虎不成。反類狗也。并戲子由云。任從飽死笑方朔。肯爲雨立求秦優。意取東方朔傳。侏儒飽欲死。及滑稽

傳優旃謂陞楯郎汝雖長何益乃雨立我雖短幸休居言弟轍家貧官卑而身材長大所以比東方朔陞楯郎而以當今進用之人比侏儒優旃也又云讀書萬卷不讀律致君堯舜知無術是時朝廷新興律學軾意非之以謂法律不足以致君於堯舜今時又專用法律而忘詩書故言我讀萬卷書不讀法律蓋聞法律之中無致君堯舜之術也又云勸農冠蓋闕如雲送老齋鹽甘似蜜以譏諷朝廷新開提舉官所至苛細生事發譴官吏惟學官無吏責也弟轍爲學官故有是句又云平生所慚今不恥坐對疲氓更鞭箠是時多徒配犯鹽之人例皆饑貧言鞭箠此等貧民軾平生所慚今不恥矣以譏諷朝廷鹽法太急也又云道逢陽虎欲與言心知其非口喏唯是時張覲俞希旦作監司意不喜其人然不敢與爭議故毀詆之爲陽虎也又山村詩第三首云烟雨濛濛鷄犬聲有生何處不安身但令黃犢無人佩布穀何勞也勸耕軾意言是時販私鹽者多帶刀杖故取前漢龔遂令人賣劍買牛賣刀買犢曰何爲帶牛佩犢意言但將鹽法寬平令人不帶刀劍而買牛犢則自力耕不勞勸督也以譏諷朝廷鹽法太峻不便也又第二首云老翁七十自腰鎌慚愧春山笋蕨甜豈是聞韶解忘味邇來三月食無鹽意山中之人饑貧無食雖老猶自採笋蕨充饑時鹽法峻急僻遠之人無鹽食動經數月若古之聖人則能聞韶忘味山中小民豈能食淡而樂乎以譏諷鹽法太急也第四首云杖藜裹飯去忽忽過眼青錢轉手空贏得兒童語音好一年強半在城中意言百姓雖得青苗錢立便於城中浮費使卻又言鄉村之人一年兩度夏秋稅又數度請納和預買錢今此更添青苗助役錢因此庄家子弟多在城中不着次第但學得城中語音而已以譏諷朝

廷新法青苗助役不便。又差開運鹽河詩云。居官不任事。蕭散羨長卿。胡不歸去來。留滯愧淵明。鹽法星火急。誰能卹農耕。薨薨曉鼓動。萬指羅溝坑。天雨助官政。泣愁淋衣纓。人如鴨與豬。投泥相蹴驚。下馬荒堤上。四顧但胡棚。淺路不容足。又與牛羊爭。歸田雖賤辱。豈識泥中行。寄語故山友。慎勿厭藜羹。軾爲是時。盧秉提舉鹽事。擘畫開運鹽河。差夫千餘人。軾於大雨中部役。其河只爲般鹽。既非農事。而役農民。秋田未了。有妨農事。又其河中間有湧沙數里。軾宣言開得不便。軾自嗟泥雨勞苦。羨司馬長卿居官而不任事。又愧陶淵明不早棄官歸去也。農事未休。而役夫千餘人。故云鹽事星火急。誰能卹農耕。又言百姓已勞苦不易。天雨又助官政。勞民轉致百姓疲役。人在泥水中。辛苦無異鴨與豬。又言軾亦在泥中。與牛羊爭路而行。若歸田。豈識於此哉。故云寄言故山友。慎勿厭藜羹。而思仕宦。以譏諷朝廷。開運鹽河不當以妨農事也。軾於上件年分。寫上件詩賦與王詵。熙寧六年春。軾爲嫁甥女。問王詵借錢二百貫。其年秋。又借到錢一百貫。自後未曾歸還。又熙寧八年內。王詵曾送到官酒六瓶。并果子藥等與軾。亦嘗有書簡往復。當年并熙寧九年內。作薄薄酒。又水調歌頭一首。復有杞菊賦一首。并引。不合云。及移守膠西。意其一飽而始至之日。齋館索然。不堪其憂。以非諷朝廷。新法減削公使錢太甚。齋醞廚薄。事皆索然無備也。軾又作超然臺記云。始至之日。歲比不登。盜賊滿野。獄訟充斥。意言連年蝗蟲盜賊獄訟之多。非諷朝廷政事闕失。并新法不便所致。及云齋廚索然。日食杞菊。以非諷朝廷。新法減削公使錢太甚。又於上件年分。節次抄寫上件詩賦等。寄與王詵。熙寧九年。軾寫書與王詵。爲一婢秋蟾。欲削髮出家作尼。并有相識

僧行杭州人各求祠部一道。當說與王詵。自後未取。約熙寧十年二月到京。王詵送到茶果酒食等。三月初一日。王詵送到簡帖。來日約出城外四照亭中相見。次日。王詵與王詵相見。令姨姪六七八人出斟酒下食。數內有倩奴。問王詵求曲子。王詵遂作洞仙歌一首。喜長春一首。與之。次日。王詵送韓幹畫馬十二疋。共六軸。求王詵跋尾。不合作詩云。王良挾矢飛上天。何必俯首求短轅。意以騏驥自比。譏諷執政大臣。無能盡我之才。如王良之能馭者。何必折節干求進用也。當月。王詵又薦會傳神僧。爲王詵寫真。乞得紫衣一道。四月。赴任徐州。王詵曾送到羊羔兒酒四瓶。乳糖獅子四枚。龍腦面花象板裙帶繫頭子錦段之類。與王詵。九月間。王詵託王鞏到京。見王詵時。覓祠部一兩道。與相知僧。十月內。王鞏書來云。王詵已許諾。未取。今年八月二十八日。供出與王詵相識。借得錢物。并寄杞菊賦。超然臺記。題韓幹馬詩。與王詵因依。又隱諱不曾作開運鹽河詩。寄王詵情由。蒙會問到王詵狀。并被王詵中送到開運鹽河詩賦。王詵於九月二十三日至二十七日。方具實招。其臆曰。遊孤山詩。戲子由詩。山村詩。元准聖旨。係降印行冊子內詩。其後杞菊賦。超然臺記。韓幹馬詩。開運鹽河詩。卽不係朝旨。降到冊子內。

與王詵作寶繪堂記

一與王鞏干涉事。熙寧五年內。鞏言王詵說賢兄與他作寶繪堂記。內有桓靈寶之走舸。王涯之複壁。皆留意之禍也。嫌意思不好。要改此數句。王詵答云。不使則已。卽不曾改。王詵先與將官雷勝并同官寄居等。一十人出獵等詩各一首。計十首。並無譏諷。王詵後批請定國將此獵詩。轉示晉卿都尉。當輸我一籌也。王鞏

字定國。王誥字晉卿。王誥令書表司張遵寄軾詩十一首并後序云。子瞻所寄新詩并獵會事述誇示一時之樂。余因回示報樂侍寢清歌者雲英等。凡十有一。輒效子瞻十家之詩。各以其名製詞一篇。寄子瞻。不知卻復輸此一籌否。其意說富貴作樂飲燕。即無譏諷。軾字子瞻。鞏向真廟朝。裏尊禮楊大年。時人稱之。今王誥尊禮子瞻。亦同年爾。軾言到家。逢着難時節。王誥言向因世居。事後也曾到登對。奏知今後不敢與人往還。上乃宣諭誥云。如溫良之士大夫。往還亦自無害。軾言次第自家是不溫良底也。其上件詩不係冊子內。

與李清臣寫超然臺記并詩

一與李清臣干涉事。熙寧九年。軾寫超然臺記寄李清臣。其譏諷已在王誥項內聲說。熙寧十年。軾知徐州。六月內。李清臣因沂山龍祠祈雨有應。作詩一首寄軾。其詩曰。南山高峻層北山亦嶠崿。坐看兩山雲出沒。雲行如驅歸若呼。始覺山中有靈物。鬱鬱其焚蘭。置置其擊鼓。祝屢祝。巫屢舞。我民無罪。神所憐。一夜雷風三尺雨。嶺木兮蒼蒼。溪水兮央央。雲散諸峯互明滅。東阡西陌農事忙。廟閉山空音響絕。軾後作一首與李清臣。其詩云。高田生黃埃。下田生蒼耳。蒼耳亦已無。更問麥有幾。蛟龍睡足亦解慚。二麥枯時雨如洗。不知雨從何處來。但聞呂梁百步聲如雷。試上南城望城北。際天菽粟青成堆。饑火燒腸作牛吼。不知待得秋成否。半年不雨坐龍慵。但怨天公不怨龍。今年一雨何足道。龍神社鬼各言功。無功日盜太倉粟。嗟我與龍同此責。勸農使者不汝容。因君作詩先自効。此詩除無譏諷外。有不合言。本因龍神慵。

懶不行雨。卻使人心怨天公。以譏諷大臣不任職。不能變理陰陽。卻使人怨天子。以天公比天子。以龍神社鬼比執政大臣及百執事。軾自言無功竊祿與大臣無異。當時送與李清臣來相謁。戲笑言承見示詩。只是勸農使者。不管恁他事。李清臣答弟轍二首。於詩後批云。可求子瞻和云。匙飯盤蔬強少留。相逢何物可消憂。緣君未得酒中趣。與我謾爲方外遊。草亂不容移馬迹。山雄全欲逼城樓。濟時異日須公等。莫狎翩翩海上鷗。軾卻作詩二首和李清臣。其內一首云。五十塵勞尙足留。閉門卻欲治幽憂。羞爲毛遂囊中穎。未許朱雲地下遊。無事會須成好飲。思歸時欲賦登樓。羨君幕府如僧舍。日向城西看浴鷗。朱雲漢成帝時。乞斬張禹。漢成帝欲誅之。朱雲曰。臣得下從龍逢比干遊足矣。龍逢。夏桀臣。比干。商紂臣。皆因諫而死。軾爲屢言新法不便。不蒙施行。以朱雲自比。意言至明之世。無誅戮之事。故軾未許與朱雲地下遊。王粲是魏武時人。因天下亂離。故粲在荊州依託作登樓賦。賦中有懷鄉思歸之意。軾爲屢言新法不便。不蒙施行。有罷官懷鄉思歸之意。亦欲作此賦也。軾又用弟轍韻。與李清臣六首。內一首云。城南短李好交遊。箕踞狂歌總自由。尊主庇民君有道。樂天知命我無憂。醉呼妙舞留連夜。注云。邦直家舞者甚多。閒作新詩斷送秋。瀟灑使君殊不俗。樽前容我攪鬚不。清臣字邦直。再次元韻。有一首云。東來嘗恨少朋遊。得遇高人蘇子由。已誓不言天下事。相看俱遣世間憂。新詩定及三千首。曩別幾成二十秋。南省都臺風雪夜。問君還記劇談不。轍字子由。清臣差修國史。軾賦詩二首送清臣。其詩內一首云。珥筆西歸近紫宸。太平典策不緣麟。付君此事全書漢。載我當時舊過秦。門外想無千斛米。墓中知有百年人。看君兩眼明如鏡。休把

春秋坐素臣。謂軾於仁廟朝。曾進論二十五首。皆論往古得失。賈誼漢文帝時人。追論秦之得失。作過秦論。史記載之。軾妄以賈誼自比。意欲李清臣於國史中載軾所進論。故將詩與李清臣。軾在臺於八月二十八日准問目。據軾供到與人往還詩。有所未盡。軾供出所與清臣唱和詩。卽不係朝旨降到冊子內。

次韻章傳

一與章傳干涉事。章傳字傳道。熙寧六年正月。作詩次章傳韻。和答云。馬融旣依梁。班固亦事竇。効顰豈不欲。頑質謝鐫鏤。所引梁冀竇憲。並是後漢時人。因時君不明。遂躋顯位。驕暴竊威福。用事而馬融。班固二人皆儒者。並依託之。軾詆毀當時執政大臣。我不能效班固馬融。苟容依附也。其上件詩。係印行冊子。准朝旨降到者。

送劉述吏部

一與劉述干涉事。熙寧八年四月十一日。軾作詩送劉述云。君王有意誅驕虜。椎破銅山鑄銅虎。聯翩三十七將軍。走馬西來各開府。是時朝廷遣使諸路點檢軍器。及置三十七將官。軾將謂今上有意征討胡虜。以譏諷朝廷。諸路遣使。及置將官。張皇不便。又云。南山伐木作車軸。東海取鼉搗戰鼓。汗流奔走誰敢後。恐乏軍資汚刀斧。保甲連村團未編。方田訟謀紛如雨。邇來手實降新書。決剔根株窮脈絡。詔書惻怛信深厚。吏能淺薄空勞苦。以譏諷朝廷法度屢更。事目煩多。吏不能曉。又云。況復年來苦饑饉。剝啗草木啖桑土。今年雨雪頗應時。又報蝗蟲生翅股。憂來洗盞欲強醉。寂寞空齋臥空甌。公廚十日不生烟。更望

紅裙踏筵擺。

註云近齋廚索然可笑。

又云近來屢得山中信。只有當歸無別語。猶將鼠雀儉太倉。未肯衣冠挂神武。

意謂邇來饑饉飛蝗蔽天之甚。以譏諷朝廷。政事闕失。新法不便之所致也。又云酒食無備。齋廚索然。以譏諷朝廷。行法減削。公使錢太甚。公事既多。旱蝗又甚。二政巨藩。尚如此窘迫。所以言山中故人。寄信令歸。但軾貪祿。未能便挂衣冠而去也。又云四方冠蓋。闐如雲。歸作二浙湖山主。以譏諷朝廷。近日提舉官。所至生事苛碎。故劉述乞宮觀歸湖山也。軾在臺八月二十二日。准問目。仰軾供具。自來做過。是何文字。軾說曾寄劉述吏部上件詩。因依其詩。即不係朝旨。降到冊子內。

寄周邠諸詩

一與周邠干涉事。軾熙寧五年六月。任杭州通判日。逐旋寄所作山村詩。其譏諷意。已在王詵項內聲說。并留題徑山詩。其譏諷。已在蘇轍項內聲說。及和述古舍人冬日牡丹絕句。有譏諷意。已在陳襄項內聲說。即節次寄與周邠。熙寧六年。因往諸縣提點。到臨安縣。有知縣大理寺丞蘇舜舉。來本縣界外太平寺相接。軾與本人爲同年。自來相知。本人見軾。復言舜舉數日前入州。卻被訓狐押出。軾問其故。舜舉言我壁劃得戶供通家業役鈔規例一年。甚簡。前日將去。呈本州諸官。皆不以爲然。呈轉運副使王庭老等不喜。差急足押出城來。軾取其規例看詳。委是簡便。因問訓狐事。舜舉言自來聞人說一小話。云燕以日出爲旦。日入爲夕。蝙蝠以日入爲旦。日出爲夕。爭之不決。訴之鳳凰。鳳凰是百鳥之王。至路次逢一禽。謂燕曰。不須往訴鳳皇在假。或云鳳皇渴睡。今不記其詳。都是訓狐權攝。舜舉意以話戲笑。王庭老等不知是。

非隔得一兩日。周邠李行中二人亦來臨安。與軾同遊徑山。蘇舜舉亦來山中相見。周邠作詩一首與軾。卽無譏諷。次韻和答。兼贈舜舉云。餽饋醉方熟。酒面喚不醒。奈何効燕蝠。屢欲爭晨暝。其意以譏諷王庭老等。如訓狐不分別是非也。元豐三年六月十三日。軾知湖州。有周邠作詩寄軾。軾答云。政拙年年祈水旱。民勞處處避嘲嘔。河吞巨野那容塞。盜入蒙山不易搜。事道故因慙孔孟。扶顛未可責由求。此詩自言遷徙數州。未蒙朝廷擢用。老於道路。并所至遇水旱盜賊夫役數起。民蒙其害。以譏諷朝廷。政事闕失。并新法不便之所致也。又云。事道故因慙孔孟。扶顛未可責由求。以言已仕而道不行。則非事道也。故有慙於孔孟。孔子責由求云。危而不持。顛而不扶。則將焉用彼相矣。顛謂顛仆也。意以譏諷朝廷大臣不能扶正其顛仆。軾在臺於九月十四日准問目。有無未盡事。軾供出上件詩因依。不係朝旨降到冊子內。

與子由詩

一與弟轍干涉事。熙寧四年十月。軾赴杭州時。弟轍至潁州相別。後十一月到杭州。本任作潁州別子由詩云。至今天下士。去莫如子猛。爲弟轍曾在制置條例。充檢詳文字。爭議新法。不合乞罷。說弟轍去之果決。意亦譏諷朝廷。新法不便也。當年十二月內。軾初任杭州。寄子由詩云。獨眠林下夢魂好。回首人間憂患長。殺馬破車從此誓。子來何處問行藏。又云。眼看時事力難勝。貪戀君恩退未能。意謂新法青苗助役等事。煩雜不可辨。亦言己才力不能勝任也。熙寧六年內。遊徑山留題云。近來愈覺世議隘。每到勝處差安便。以譏諷朝廷之用人。多是刻薄褊隘之人。不少容人過失。見山中寬閑之處爲樂也。其詩係朝旨降